

# Ini Sa Igsulat Denu Si HOSUWA

## Ini Denu Sa Libelu Hosuwa

*Na, iya sa tinulon diyà siini igssulat denu si Hosuwa sa egoh sa medoo tegeIslaél migpeka sa tanà Kanan egoh i Hosuwa nekesambì diyà si Mosis sa mig-uwit kenagda. Tinulon ma diyà siini libelu sa egoh da migbatas diyà sa lawa't wayeg Holdan owoy sa egoh da nekekuwa sa menuwa Héliko owoy sa egoh da ma miggila diyà sa menuwa Hai. Tinulon ma sa egoh da i Nemula migsepasaday sa medoo etaw di.*

*Na, beken sa langun igssulat denu si Hosuwa sa nekesulat diyà sa kagi Menubù.*

---

## Ini Sa Inikagi I Nemula Diyà Si Hosuwa

*(Hosuwa 1:1-9)*

**1** <sup>1</sup>Na, egoh i Mosis nehagtay pelawà, kagdi sa sinaligan i Datù Nemula, owoy iya sa salu di si Hosuwa anak i Nun. Agulé egoh i Mosis nematay dé, inikagiyan i Datù Nemula Hosuwa i, <sup>2</sup>guwaen di, “Nematay dé si Mosis sa sinaligan ku. Na, tapay ka dé igkes owoy sa langun tegeIslaél ini egoh di enù ka matas yu diyà sa lawa't wayeg Holdan anì mekeangay yu diyà sa tanà igpasad ku ibegay ku diyà keniyu i medoo tegeIslaél. <sup>3</sup>Enù ka lagà mendaa sa egoh ku migpasad diyà si Mosis, ibegay ku diyà keniyu sa langun tanà meukitan yu. <sup>4</sup>Ini taman sa tanà ibegay ku diyà keniyu. Edung diyà sa melabel tanà mediyù dalesan denu kimataan taman diyà sa medoo getan Libano denu belabagan. Owoy edung ma diyà sa dakel lawa't wayeg Upelatis denu tebowon agdaw owoy mig-ukit diyà sa tanà sa medoo tegeHétiyo taman sa Dagat Méditeliya denu eledan agdaw. <sup>5</sup>Endà duen sa mekeatu keniko taman sa lugay ko nehagtay, enù ka unut-unutan ku kuna lagà mendaa sa keunut-unut ku diyà si Mosis egoh anay. Endà pandayaen ku kuna owoy endà ma iniyugan ku kuna. <sup>6</sup>Na, pebagel ko sa pedu ko owoy pebalaw ka

ma, enù ka kuna dé sa pangulu siini medoo etaw amuk tepelen yu siini tanà ibegay ku diyà keniyu, lagà mendaa sa igpasad ku diyà sa medoo tupù yu. <sup>7</sup>Huenan di, pebagel ko temù sa pedu ko owoy pebalaw ka ma. Tulik ka anì mangunut ka diyà sa langun uledin igsugkow i Mosis sa sinaligan ku diyà keniyu egoh anay. Yaka egسالibang nga diyà sa uledin anì tigtu kumepion sa langun egkebaelan ko. <sup>8</sup>Tulik ka anì pesagkat ko basa diyà sa medoo etaw sa medoo uledin ku igsulat. Inauwi yu agdaw owoy sigep anì kumepion sa kepangunut yu diyà sa langun uledin. Amuk hediya, kumepion doo sa kehagtayan yu owoy kumepion ma sa langun egkebaelan yu. <sup>9</sup>Petulengtuleng ko sa igsugù ku diyà keniko anì pebagelen ko sa pedu ko owoy pebalaw ka ma. Yaka egkelenawan na owoy yaka ma egkesemek ka, enù ka aken si Datù Nemula sa egpigtuuwen ko sa umunut-unut diyà keniko sumalà dé sa angayan ko.”

**Ini Sa Egh I Lahab Migbulig Sa Pineangay I  
Hosuwā Egpekuhì Diyà Sa Menuwa Héliko**

**2** <sup>1</sup>Na, egoh sa medoo tegeIslaél mig-esud pelawà diyà Sitim, duen duwa etaw pinekuhì i Hosuwā. Sinugù di kagda, guwaen di, “Angay yu kuhì sa menuwa Héliko diyà sa tanà Kanan.” Agulé mig-ipanaw sa duwa sinugù di owoy mig-angay da diyà sa menuwa Héliko. Miggemow da diyà sa dalesan i Lahab sa bayi tegepediyangdang, enù ka tumudug da dahiya.”

<sup>2</sup>Dodoo duen sa etaw migtulon diyà sa datù tegeHéliko, guwaen da, “Hahaa ko, duen etaw tegeIslaél mig-awuh diyà sa menuwa ta siini sigep enù ka egkuhien da sa menuwa ta.” <sup>3</sup>Aglé pinesuguan sa datù tegeHéliko Lahab i, guwaen di, “Pelaun ko sa medoo maama mig-angay diyà keniko, enù ka tegekuhì da gaa. Iya daa sa ungayà da egkuhien da sa uwang menuwa ta.”

<sup>4</sup>Dodoo tapay dé pinelidung i Lahab sa duwa maama. Agulé guwaen di, “Tuu ma doo, duen duwa maama mig-angay diyà kenak, dodoo endà netiigan ku duu sa keduwan da. <sup>5</sup>Aglé mig-ipanaw da dema egoh di sumigep egoh di buyu mepintuan sa bengawan sa kutà menuwa ta, dodoo endà inigsà ku duu sa angayan da. Dodoo amuk mesiyapat yu lumohot, meuma yu kéen kagda.” <sup>6</sup>Na, tapay dé inuwit i Lahab sa duwa maama diyà sa mepatag atep sa dalesan di enù ka linidung di kagda diyà leketanà sa medoo inay lino egbekolen di dahiya. <sup>7</sup>Na, egoh sa medoo tegeHéliko migdineg iya wé inikagi i Lahab, migpesiyapat da miglohot sa duwa tegekuhì taman diyà sa batasan lawa't wayeg Holdan. Egoh da mig-ipanaw sa medoo eglohot, nepintuan dé sa bengawan sa kutà menuwa Héliko.

---

<sup>a</sup> 2:1 Migpenemdem da kéen amuk egtudug da diyà sa dalesan i Lahab endà egسagipāen sa medoo liyu etaw kagda enù ka takà eggemow sa medoo maama diyà sa dalesan di.

<sup>8</sup>Na, egoh sa duwa tegekuhi endà pa egtudug da, miggemow dema Lahab i diyà sa atep dalesan kenà da miglidung. <sup>9</sup>Mig-ikagi diyà kenagda, guwaen di, “Netiigan ku igbegay i Datù Nemula siini tanà ké diyà keniyu, huenan di eglukub sa langun etaw diyà siini tanà danà da tigtu nelimedangan diyà keniyu. <sup>10</sup>Enù ka dinineg ké denu sa egoh i Datù Nemula migsekawang sa Melalegà Dagat kenà yu migbatas egoh yu miglegkang diyà Igiptu.<sup>b</sup> Owoy netiigan ké ma inimatayan yu Sihon i owoy si Og, sa duwa datù sa medoo tegeAmoliya lapeg sa langun sundalu da ma dutu siedò tanà sa tanà dutu lawa't Holdan denu tebowon agdaw.<sup>c</sup> <sup>11</sup>Egoh ké migdineg denu iya wé binaelan yu, nelimedangan ké owoy tigtu ké ma egpesu diyà keniyu, enù ka si Datù Nemula sa egpigtuuwen yu sa Nemula egsabà sa langit owoy sa tanà ma. <sup>12</sup>Na, pengibeti yu, hih, Datù Nemula i anì tabangan yu aken owoy sa malayan ku ma, lagà mendaa sa ketabang ku keniyu ini egoh di. Owoy baeli yu ma sa tandà sa kesepasaday ta. <sup>13</sup>Egpegeni a diyà keniyu anì alukan yu sa emà ku owoy sa inay ku owoy sa medoo kakay ku owoy sa medoo hadi ku owoy sa langun malayan da ma. Yoko eglapeg kenami diyà sa medoo etaw imatayan yu.”

<sup>14</sup>Migsagbi sa duwa tegekuhi diyà kenagdi, guwaen da, “Meimatayan i Nemula doo kami amuk pandayaen ké kiyu meimatayan. Amuk endà tulonen ko duu diyà etaw siini egbaelan ké, igpasad ké diyà keniko sa kehidu ké keniyu anì endà medaetan yu amuk ibegay i Datù Nemula siini tanà diyà kenami.”

<sup>15</sup>Na, ig-unoy diyà sa kutà menuwa Héliko sa dalesan i Lahab, huenan di tinuntun di diyà tali sa duwa tegekuhi pineukit di diyà sa tatawan sa dalesan di anì mekepelaguy da kedu diyà sa menuwa Héliko. <sup>16</sup>Dodoo egoh di endà pa migpeipanaw kenagda, mig-ikagi diyà kenagda, guwaen di, “Angay yu pelawà diyà sa getan-getan anì endà mesiegunan yu duu sa medoo miglohot keniyu. Lidung yu pelawà dutu taman telu agdaw. Agulé amuk lumikù dé sa medoo tegelagbet keniyu, lagbas yu dé likù dutu kenà yu dò.”

<sup>17</sup>Mig-ikagi sa duwa maama diyà kenagdi, guwaen da, “Petuuwen ké doo sa igpepasad ko diyà kenami amuk baelan ko ini i. <sup>18</sup>Amuk meuma sa kepelikù ké anì pekawen ké siini menuwa yu, poloti ko siini melalegà tali diyà sa tatawan kenà ko migtuntun kenami. Owoy setiponoy yu diyà sa dalesan ko sa emà ko owoy sa inay ko owoy sa medoo kakay ko owoy sa medoo hadi ko owoy sa langun malayan sa emà ko. <sup>19</sup>Amuk duen etaw lumaun diyà siini dalesan ko owoy amuk meimatayan, endà mesagbian ké duu iya wé enù ka hagdi salà dé. Dodoo nami salà amuk duen etaw meimatayan diatas sa dalesan ko. <sup>20</sup>Dodoo amuk tulonen ko diyà etaw siini egbaelan ké, endà ipetuu ké duu sa igpepasad ko diyà kenami.”

<sup>b</sup> 2:10 Basa ko Éksodo 14:21-31    <sup>c</sup> 2:10 Basa ko Kebilang 21:21-35

<sup>21</sup> Migsagbì Lahab i, guwaen di, “Meketuu doo sa inikagi yu.” Agulé tinuntun di kagda diyà sa liyu sa kutà menuwa Héliko. Egoh da mig-ipanaw dé, igpolot di sa melalegà tali diyà sa tatawan sa dalesan di.

<sup>22</sup> Na, egoh sa duwa tegekuhi miglegkà dahiya, mig-angay da diyà sa getan-getan owoy miglidung da taman telu agdaw, enù ka inuman da kagda eglagbet sa medoo egkelukuy sumigkem kenagda. Egoh di neuma sa ketelu di agdaw, miglikù sa medoo etaw eglagbet enù ka endà hinaa da duu kagda. <sup>23</sup> Agulé miglungel ma dé sa duwa tegekuhi, owoy iya da pelawà matas sa lawa't wayeg Holdan enù ka mangay da diyà si Hosuwa anak i Nun. Egoh da migtebow, tinulon da diyà kenagdi sa langun nebaelan da. <sup>24</sup> Owoy guwaen da, “Tuu doo ibegay i Datù Nemula siini tanà diyà kenita, enù ka egkelimedangan sa langun etaw dahiya diyà kenita.”

### **Ini Sa Egoh Sa Medoo TegeIslaél Migbatas Sa Lawa't Holdan**

*(Hosuwa 3:14-17)*

**3** <sup>14</sup> Na, egoh sa medoo tegeIslaél miglegkang diyà sa kenà da mig-esud anì matas da diyà sa lawa't wayeg Holdan, muna diyà kenagda sa medoo tegesimbà mig-uwit sa Baul Tandà Sa Igpasad i Nemula. <sup>15</sup> Egoh iya, sasang keketu owoy nebensek wayeg sa kebatuwan sa lawa't Holdan enù ka iya sa sasang di egkemahà. Dodoo egoh da migkogkog diyà sa wayeg sa medoo tegesimbà eg-uwit sa Baul Tandà Sa Igpasad i Nemula, <sup>16</sup> petow dé nebelel sa kedelug di, hediya ka duen sa mig-alang sa wayeg dutu dagel dò diyà sa selatal sa menuwa Adan medapag diyà sa menuwa Saletan. Dodoo sa wayeg denu dibabà sa kenà di nebelel, migdelug doo uman eg-angay diyà sa Dagat Alaba<sup>d</sup> taman sa egoh di netikal dé sa kebatuwan sa lawa't Holdan. Egoh di netikal dé, iya da pelawà kumatin tanà dutu sa medoo tegeIslaél diyà selatal sa menuwa Héliko. <sup>17</sup> Ligò sa medoo etaw mig-ukit diyà sa netikal kebatuwan lawa't Holdan, migtigdeg pelawà sa medoo tegesimbà eg-uwit sa Baul Tandà Sa Igpasad i Datù Nemula diyà sa teliwadà kebatuwan taman sa egoh sa langun duma da tegeIslaél nekekatin.

### **Tinipon Sa Medoo TegeIslaél Sa Medoo Batu Anì Metulengan Da Sa Binaelan I Datù Nemula**

*(Hosuwa 4:1-11)*

**4** <sup>1</sup> Na, egoh sa langun tegeIslaél nekekatin dé tanà dutu sa lawa't Holdan, mig-ikagi Datù Nemula i diyà si Hosuwa, guwaen di,

---

<sup>d</sup> 3:16 Pinengadanan da ma sa Dagat Nematay.

<sup>2</sup>“Hemilì ko sa sepulù owoy duwa maama, sigbaenay diyà sa sepulù owoy duwa geumpung tugod i Islaél. <sup>3</sup>Sugù ko kagda pekuwa sa sepulù owoy duwa batu diyà sa teliwadà lawa't Holdan kenà sa medoo tegesimbà egtigdeg anì angay da itenà diyà sa kenà yu umesud igkani sigep.”

<sup>4</sup>Agulè sinetipon i Hosuwa sa sepulù owoy duwa maama hinemilì di diyà sa sepulù owoy duwa geumpung tugod i Islaél. <sup>5</sup>Mig-ikagi diyà kenagda, guwaen di, “Angay yu diyà sa teliwadà lawa't Holdan kenà sa medoo tegesimbà egseoyong sa Baul Tandà Sa Igpasad i Datù Nemula sa Nemula yu. Owoy uman sebaen diyà keniya tiang yu sigbaenay batu enù ka sepulù owoy duwa ma geumpung sa tugod i Islaél. <sup>6</sup>Setiponen ta siini medoo batu anì metulengan sa medoo etaw sa binaelan i Datù Nemula ini egoh di. Amuk meuma sa egoh sa tugod yu umigsà diyà keniya sa selepangan siini medoo batu sinetipon, <sup>7</sup>tulon yu diyà kenagda sa egoh di petow dé nebeles sa kedelug sa wayeg owoy netikal ma sa kebatuwan sa lawa't Holdan egoh da telibubu egbatas sa medoo tegesimbà mig-uwit sa Baul Tandà Sa Igpasad i Datù Nemula. Na, danà siini medoo batu sinetipon, metulengan sa medoo tegeIslaél sa kebatas ta sa lawa't Holdan taman melugay.”

<sup>8</sup>Agulè pinangunutan sa sepulù owoy duwa maama sa igsugù i Hosuwa diyà kenagda. Danà sa igsugù i Datù Nemula diyà si Hosuwa, kinuwa da sa sepulù owoy duwa batu diyà sa teliwadà lawa't Holdan enù ka sepulù owoy duwa ma geumpung sa tugod i Islaél. Inuwit da sa medoo batu diyà sa kenà da mig-esud owoy igtenà da dahiya. <sup>9</sup>Sinetipon i Hosuwa sa sepulù owoy duwa batu kinuwa da diyà sa kenà da egtigdeg sa medoo tegesimbà migseoyong sa Baul Tandà Sa Igpasad i Nemula.<sup>e</sup> Na, dahiya doo siedò medoo batu taman ini egoh di.<sup>f</sup>

<sup>10</sup>Na, egtigdeg pelawà sa medoo tegesimbà diyà sa teliwadà lawa't Holdan taman sa egoh di meubus sa langun egbaelan igsugù i Datù Nemula diyà si Hosuwa ipeikagi di diyà sa medoo etaw. Pinangunutan i Hosuwa sa langun igsugù i Mosis diyà kenagdi sa egoh di nehagtay pelawà. Na, migpesiyapat sa medoo etaw migbatas sa lawa't Holdan. <sup>11</sup>Egoh sa langun etaw nekekatin dé tanà dutu, iya pelawà sa egoh da kumatin ma sa medoo tegesimbà mig-uwit sa Baul Tandà Sa Igpasad i Datù Nemula. Agulè egoh da eg-ipanaw dema, mighuna dema sa medoo tegesimbà diyà sa medoo duma da tegeIslaél.

### Ini Sa Egoh Di Endà Dé Migduen Sa Kaenen Mana

*(Hosuwa 5:10-12)*

**5** <sup>10</sup>Na, egoh sa medoo tegeIslaél mig-esud pelawà diyà Gilgal diyà sa sugud medapag diyà menuwa Héliko, binaelan da sa Pista Sa

<sup>e</sup> 4:9 Diyà sa kagi Hibelu, mebaluy ma guwaen di, “Duen ma sepulù owoy duwa batu sinetipon i Hosuwa diyà sa teliwadà lawa't Holdan kenà da migtigdeg sa medoo tegesimbà migseoyong sa Baul Tandà Sa Igpasad i Nemula.” <sup>f</sup> 4:9 Beken taman ini egoh di egoh ta nehagtay, dodoo taman daa sa egoh i Hosuwa nehagtay pelawà.

Kinetalà Sa Kepigtamay i Nemula egoh di mahapun dé sa kesepulù owoy epat di agdaw diyà sa muna bulan diyà sa palay da. <sup>11</sup>Egoh di neubus iya wé Pista da, egoh di umenaw simag, kinaen da dé sa kaenen kinuwa da diyà sa tanà Kanan, sa teligo sinelal owoy sa binaelan da epan endà duen ipelenuk di. <sup>12</sup>Egoh da nekekaen dé sa kaenen diyà sa tanà Kanan, iya sa egoh di migsabuh dé sa ketebow sa kaenen mana.<sup>§</sup> Edung egoh iya, iya dé sa egkaenen da sa kaenen nekuwa da diyà sa tanà Kanan.

### Ini Sa Egoh Da Migpeka Sa Menuwa Héliko

(Hosuwa 6:1-24)

**6** <sup>1</sup>Na, netiigan sa medoo tegeHéliko nekekatin dé sa medoo tegeIslaél sa lawa't wayeg Holdan, huenan di pinintuan da sa langun bengawan kutà menuwa da. Endà duen etaw mekelaun owoy endà ma duen sa mekeawuh. <sup>2</sup>Agulé mig-ikagi Datù Nemula i diyà si Hosuwa, guwaen di, “Taa ko, tigtu petabanen ku kiyu diyà siini menuwa Héliko, lapeg sa datù di owoy sa langun sundalu di ma mebalaw. <sup>3</sup>Na, ini sa baeli yu lapeg sa langun sundalu ko, segulê yu ulingut sa kutà menuwa Héliko uman agdaw taman enem agdaw. <sup>4</sup>Pehuna ko sa pitu tegesimbà anan épê tegbuli binaelan sidung kebilibili diyà sa medoo tegeuwit sa Baul Tandà sa Igpasad i Nemula. Amuk meuma sa kepitu di agdaw, ulingut yu taman pitu gulê sa kutà menuwa ligò di eghiyupen sa medoo tegesimbà sa tegbuli da. <sup>5</sup>Agulé pelugaylugayen da sa metaled dagi tegbuli. Amuk dinegen yu iya wé, petibos yu langun. Hê, petow dé megubal sa kutà iya wé menuwa. Huenan di, endà dé duen sa kenà yu mealang umawuh diyà sa menuwa.”

<sup>6</sup>Na, sinetipon i Hosuwa anak i Nun sa medoo tegesimbà owoy mig-ikagi diyà kenagda, guwaen di, “Uwit yu sa Baul Tandà sa Igpasad i Nemula, owoy pehuna yu sa pitu tegesimbà eg-uwit tegbuli binaelan sidung kebilibili.” <sup>7</sup>Agulé mig-ikagi diyà sa langun etaw, guwaen di, “Ipanaw yu dé. Angay yu ulingut sa kutà menuwa. Pehuna yu sa medoo sundalu eg-uwit kinemkem diyà siedò Baul i Datù Nemula.”

<sup>8</sup>Hê, pinangunutan da sa igsugù i Hosuwa. Mighuna sa pitu tegesimbà épê tegbuli diyà sa medoo tegeuwit sa Baul Tandà sa Igpasad i Nemula, owoy eghiyupen da ma sa tegbuli da ligò da eg-ipanaw. <sup>9</sup>Iya dema sa tigtu muna diyà sa medoo tegesimbà eghiyup tegbuli sa medoo sundalu eg-uwit kinemkem, owoy duen ma medoo sundalu eg-uwit kinemkem hudihudi diyà sa medoo eg-uwit sa Baul Tandà sa Igpasad i Nemula ligò

---

§ 5:12 Igbegay i Nemula sa kaenen mana diyà sa medoo tegeIslaél taman epat pulù gepalay egoh da egsehalihali diyà sa melabel tanà mediyù dalesan. Basa ko denu sa mana diyà Eksodo 16.

di takà egdagì sa tegbuli da. <sup>10</sup>Dodoo hinawidan i Hosuwa sa langun etaw anì endà metibos da owoy anì endà ma mikagi da taman endà meuma sa egoh di sumugù kenagda. <sup>11</sup>Na, danà sa inikagi i Hosuwa, inuwit da sa Baul Tandà sa Igpasad i Datù Nemula owoy segulê inulingut da sa kutà menuwa Héliko. Agulé miglikù da dema diyà sa kenà da eg-esud.

<sup>12</sup>Na, egoh di umenaw simag, miglapus Hosuwa i mig-enaw. Agulé inuwit sa medoo tegesimbà dema sa Baul Tandà sa Igpasad i Nemula, <sup>13</sup>owoy mighuna dema sa pitu tegesimbà takà eghiyup tegbuli. Mighuna dema sa medoo sundalu épê kinemkem diyà siedò medoo tegesimbà épê tegbuli owoy duen ma sa medoo sundalu épê kinemkem hudihudi diyà sa medoo tegeuwit sa Baul Tandà sa Igpasad i Nemula. Ligò da eg-ipanaw, endà egsabuh sa dagì tegbuli da. <sup>14</sup>Segulê dema inulingut da iya wé kutà menuwa diyà sa keduwa di agdaw, agulé miglikù da dema diyà sa kenà da mig-esud. Anan hediya sa binaelan da uman agdaw taman enem agdaw.

<sup>15</sup>Na, egoh di neuma sa kepitù di agdaw, migpanay da eg-enaw egoh di eg-awang dé sa tanà, owoy pitu gulê inulingut da sa kutà menuwa Héliko lagà mendaa sa egoh muna. Dodoo sa kepitù di agdaw daa sa egoh di pitu gulê sa keulingut da. <sup>16</sup>Agulé egoh di neuma sa kepitù di gulê, migpetaled sa medoo tegesimbà egtegbuli. Hê, inikagiyan i Hosuwa sa medoo etaw, owoy guwaen di, “Petibos yu dé, enù ka igbegay i Datù Nemula siini menuwa diyà kenita. <sup>17</sup>Meulow sa langun taman sa menuwa owoy meimatayan ma sa medoo etaw di, enù ka iya sa ukit di mekebegay diyà si Datù Nemula. Iya daa sa mealukan si Lahab sa tegepediyangdang owoy sa langun duma di diyà sa dalesan di, enù ka linidung di sa etaw pinekuhì ta. <sup>18</sup>Dodoo yoko egkuwa duu sa duma langun taman diyà sa menuwa anì endà mekesugsug ki. Amuk duen sa kumuwa, mebaluy iya sa pesuwan ta mepelihay owoy mekesugsug ki ma, kita i langun tugod i Islaél. <sup>19</sup>Dodoo sa langun taman binaelan, iling ka bulawan ataw ka pilak ataw ka galang ataw ka putow, iya sa mekebegay ta diyà si Datù Nemula enù ka itagù ta diyà sa taguan pilak i Datù Nemula.”

<sup>20</sup>Agulé pinetaled sa medoo tegesimbà sa ketegbuli da. Egoh sa medoo etaw migdineg iya wé, pinetaled da ma sa kepetibos da. Hê, petow dé negubal sa langun kutà sa menuwa. Huenan di, mig-awuh da langun enù ka endà dé duen sa kenà da nealang. Hê, nepeka da iya wé menuwa. <sup>21</sup>Sundang sa ig-imatay da langun diyà iya wé menuwa, maama owoy bayi, lukes owoy batà, lapeg sa langun hinagtay da ma. Endà duen sa nesamà.

<sup>22</sup>Na, inikagiyan i Hosuwa sa duwa maama pinekuhì di, guwaen di, “Igpasad yu diyà si Lahab endà imatayan ta duu owoy sa medoo etaw diyà sa dalesan di. Huenan di, angay yu dé diyà sa dalesan di owoy

pelaun yu kagda anì mealukan da.” <sup>23</sup>Hê, inangay da egpelaun Lahab i owoy sa emà di owoy sa inay di owoy sa medoo kakay di owoy sa medoo hadi di owoy sa langun malayan da. Inuwit da kagda langun diyà sa medapag kenà sa medoo tegeIslaél mig-esud.

<sup>24</sup>Agulé inulow da sa menuwa Héliko lapeg sa medoo langun taman di, liyu daa sa langun taman binaelan, iling ka bulawan ataw ka pilak ataw ka galang ataw ka putow, enù ka igtagù da iya wé diyà sa taguan pilak i Datù Nemula.

### Ini Sa Egoh I Akan Nesalà

**7** <sup>1</sup>Na, igsugù i Datù Nemula diyà sa medoo tegeIslaél anì ulowen da sa langun taman diyà sa menuwa Héliko, dodoo endà pinangunutan da duu sa igsugù di denu sa langun taman hinawidan di kuwaen. Migtipay polo Akan i anak i Kalemi, sa bébê i Sabdi owoy bébê lulud i Silah, tugod i Huda, enù ka kinuwa di sa duma langun taman. Huenan di, binulitan i Datù Nemula sa medoo tegeIslaél.

<sup>2</sup>Na, duen dema etaw pineangay i Hosuwa egpekuhì sa menuwa Hai, sa menuwa denu tebowon agdaw amuk diyà ki sa menuwa Bétél owoy medapag ma diyà sa menuwa Bét-aben. Egoh da migkuhì sa menuwa Hai, <sup>3</sup>miglikù da owoy mig-ikagi da diyà si Hosuwa, guwaen da, “Mebaluy amuk endà langun di etaw sa mangay dutu. Enget amuk duwa ngibu geetaw daa ataw ka telu ngibu sa peangayen ko egpepeka sa menuwa Hai. Yaka eglengon duu sa langun duma ta, enù ka endà iseg di medoo sa etaw eg-ugpà dahiya.”

<sup>4</sup>Huenan di, telu ngibu daa sa kedoo tegeIslaél mig-angay egtepel sa menuwa Hai. Dodoo endà nekegaga da. Tinabanan polo sa medoo etaw Hai kagda. <sup>5</sup>Linohot da ma kagda kedu diyà sa bengawan sa menuwa da taman sa atung kenà etaw egkuwa batu pinengadanan da Sibalim. Egoh da eglungel, neimatayan doo sa telu pulù owoy enem geetaw. Huenan di, tigtu migkelungoy dé sa pedu sa medoo tegeIslaél owoy nelimedangan da ma.

<sup>6</sup>Agulé kinisì i Hosuwa owoy sa medoo ulu-ulu tegeIslaél sa ginis da enù ka tigtu migkedaet sa pedu da danà sa nebaelan sa medoo duma da. Miglagkeb da diyà sa taengan sa Baul Tandà sa Igpasad i Datù Nemula, owoy binuhbuhan da ma kepung sa ulu da. Mig-ugpà da dahiya taman mig-eled sa agdaw. <sup>7</sup>Migsimbà Hosuwa i, guwaen di, “O Datù Nemula, kuna sa eggsabà sa langun. Maen di ya pinekatin ko kami tanà dini diyà sa lawa't Holdan amuk ipegelà ko doo kami diyà sa medoo tegeAmoliya? Mepion pa hedem amuk endà dé miglegkà ké diyà sa tanà dutu sa lawa't Holdan. <sup>8</sup>O Datù Nemula, ngadan sa mebaelan ku ini egoh di enù ka minekeesud-esud siini medoo tegeIslaél kedu diyà sa kuntelà ké? <sup>9</sup>Amuk dumineg sa medoo tegeKanan owoy sa medoo liyu balangan etaw diyà

siini tanà denu ini i, iya kéen sa baelan da seulingutan da kami anì meimatayan ké langun. Amuk hediya, ngadan sa baelan ko anì endà mesumbung ka?”

<sup>10</sup> Sinagbian i Datù Nemula Hosuwa i, guwaen di, “Tigdeg yu dé. Maen di ya iya sa binaelan yu eglagkeb yu diyà tanà? <sup>11</sup> Nesalà doo sa medoo tegeIslaél, enù ka endà pinangunutan da duu sa igsugù ku diyà kenagda. Kinuwa da sa duma langun taman igsugù ku ipeulow. Pinenakaw da owoy igtagù da diyà sa hagda munoy langun taman, agulé migbutbut da diyà sa binaelan da. <sup>12</sup> Iya sa pesuwan di endà mig-atu da eggila diyà sa medoo kuntelà da. Huenan di, minekepeesud da enù ka mig-ikagi a kagda polo sa metabanan. Endà dé umunut-unut a diyà keniyu taman endà ulowen yu duu sa langun taman kinuwa yu hinawidan ku. <sup>13</sup> Na, tigdeg ka dé, owoy ikagiya ko sa medoo etaw anì petiengawen da kagda diyà sa kehaa ku anì mangay da diyà sa taengan ku simag. Ini sa kagi ku, aken i Datù Nemula egpigtuuwen sa medoo tegeIslaél, guwaen ku, ‘Duen sa etaw diyà keniyu miglidung sa duma langun taman igsugù ku ipeulow. Endà mekeatu yu diyà sa medoo kuntelà yu taman endà mekedan di diyà keniyu iya wé langun taman.’ <sup>14</sup> Huenan di, simag peangay ko diyà sa taengan ku sa uman segeumpung tugod i Islaél. Agulé ini sa baeli ko diyà sa umpung di tandaan ku diyà keniko, setigesa ko sa uman segeapilidu. Agulé sa apilidu da tandaan ku diyà keniko, setigesa ko ma sa uman segemalay. Hediya ma, setigesa ko dema sa malayan tandaan ku diyà keniko anì sigbaenbaenay da mangay diyà sa taengan ku. <sup>15</sup> Meulow doo sa etaw metandaan migkuwa sa langun taman igsugù ku ipeulow. Endà dumuen sa mesamà diyà sa langun malayan di, lapeg sa langun taman di diatas, enù ka tinipay di sa igsugù ku denu sa langun taman diyà sa menuwa Héliko, owoy tigtu nemalaan sa medoo tegeIslaél danà iya wé binaelan di.”

<sup>16</sup> Na, egoh di sumimag, pinelapus i Hosuwa sa langun tegeIslaél anì mangay sa uman segeumpung diyà sa taengan i Datù Nemula. Hê, netandaan sa umpung tugod i Huda. <sup>17</sup> Agulé pinedapag i Hosuwa sa medoo apilidu tugod i Huda, owoy iya sa netandaan sa apilidu Silah. Agulé pinedapag di ma sa medoo malayan apilidu Silah, owoy iya sa netandaan sa malayan i Sabdi. <sup>18</sup> Hê, pinedapag di ma sa medoo etaw sa malayan i Sabdi, owoy iya sa netandaan si Akan anak i Kalemi, sa bébê i Sabdi owoy bébê lulud i Silah.

<sup>19</sup> Agulé mig-ikagi Hosuwa i diyà si Akan, guwaen di, “O Adu, egtigdeg ka dé diyà sa taengan i Datù Nemula sa egpigtuuwen sa medoo tegeIslaél, huenan di tulon ko daa sa tuu. Tuloni ko aken sa binaelan ko. Yaka eglidung duu diyà kenak.”

<sup>20</sup> Migsagbi Akan i, guwaen di, “Tuu doo, nesalà a diyà si Datù Nemula sa egpigtuuwen ta, kita i medoo tegeIslaél. Ini sa binaelan ku. <sup>21</sup> Hinaa ku

sa tigtu metolol kawal kedu Babiloniya dò diyà sa medoo langun taman diyà sa menuwa Héliko. Owoy duen ma segepapan bulawan tengà kakilu kéen sa kebegat di owoy duen ma duwa kakilu pilak. Tigtu neiyapan ku iya wé, huenan di kinuwa ku owoy iglidung ku diyà tanà diyà sa kenà kemalig ku. Igtagù ku sa pilak denu leketanà.”

<sup>22</sup>Na, egoh i Hosuwa migdineg iya wé, duen etaw sinugù di. Hê, migletu da eg-angay diyà sa kemalig i Akan. Tuu doo, hinaa da dahiya sa langun taman nekelidung lapeg sa pilak denu leketanà. <sup>23</sup>Kinuwa da owoy inuwit da diyà si Hosuwa owoy diyà sa langun duma da tegeIslaél. Igtenà da dahiya diyà sa taengan i Datù Nemula. <sup>24</sup>Agulé inuwit i Hosuwa owoy sa medoo tegeIslaél Akan i owoy sa pilak owoy sa kawal owoy sa segepapan bulawan, owoy sa sawa di owoy sa medoo anak di ma, owoy sa langun hinagtay da sapì owoy asnu owoy kebilibili, owoy sa langun taman da owoy sa kemalig da ma. Inuwit da diyà sa lepak pinengadanan da Lepak Kebogowon.

<sup>25</sup>Mig-ikagi Hosuwa i, guwaen di, “Na, binogo yu kami danà sa binaelan yu, huenan di begayan i Datù Nemula ma kiyu sa dakel bogo ini egoh di.” Agulé binuung sa medoo tegeIslaél batu Akan i owoy sa sawa di owoy sa medoo anak da taman mematay da. Hê, inulow da ma kagda langun, lapeg sa langun taman da inuwit da dahiya. <sup>26</sup>Agulé dinugkowon da kagda batu owoy tapay doo dahiya sa medoo batu taman ini egoh di.<sup>h</sup> Huenan di, Lepak Kebogowon sa kepengadan da iya wé lepak taman ini egoh di. Na, egoh da mig-imatay si Akan, nekedan ma dé sa kebulit i Datù Nemula sa medoo tegeIslaél.

### Ini Sa Egoh Sa Agdaw Mig-ugpà Anì Tabanan I Hosuwa Sa Medoo TegeAmoliya

*(Hosuwa 10:1-15)*

**10** <sup>1</sup>Na, tinabanan i Hosuwa ma sa medoo etaw diyà sa menuwa Hai, lagà mendaa sa binaelan di diyà sa menuwa Héliko. Neulow sa menuwa Hai, owoy inimatayan da ma sa datù di owoy sa langun etaw eg-ugpà dahiya. Agulé neseasad sa medoo etaw tegeGibayon owoy sa medoo tegeIslaél anì meselanih da eg-ugpà, huenan di neseamut da dé eg-ugpà. Na, egoh sa datù tegeHélusalém si Adonisedek migdineg denu iya wé, <sup>2</sup>tigtu nelimedangan sa medoo etaw tegeHélusalém, enù ka dakel menuwa sa Gibayon lagà sa kedakel sa liyu menuwa épê datù, owoy uman pa sa kedakel di diyà sa menuwa Hai owoy mebalaw ma sa medoo sundalu tegeGibayon.

---

<sup>h</sup> 7:26 Beken taman ini egoh di egoh ta nehagtay, dodoo taman daa sa egoh i Hosuwa nehagtay pelawà.

<sup>3</sup>Huenan di, igpeuwit i Datù Adonisedek sa kagi di diyà sa epat datù duma di tegeAmoliya, si Datù Hoham diyà sa menuwa Hibelon, owoy si Datù Piliyam diyà sa menuwa Halmut, owoy si Datù Hapiya diyà sa menuwa Lakis, owoy si Datù Debil diyà sa menuwa Iglon. <sup>4</sup>Guwaen di, “Tigtu egpegeniyen ku sa ketabang yu. Angayen ta mengayaw sa menuwa Gibayon, enù ka nesepasad dé sa medoo tegeGibayon owoy si Hosuwa owoy sa medoo tegeIslaél anì meselanih da eg-ugpà.” <sup>5</sup>Hê, neseunut sa penemdem sa lima datù tegeAmoliya. Huenan di, inangay da egseulingutan sa menuwa Gibayon, agulé ginila da.

<sup>6</sup>Agulé migpeuwit kagi sa medoo tegeGibayon diyà si Hosuwa diyà Gilgal kenà sa medoo tegeIslaél mig-esud. Guwaen da diyà kenagdi, “Yaka egpandayà duu kami i medoo egsugùsuguen ko. Petéél ka angay dini anì tabangan ko kami. Aluki ko kami, enù ka neseunut da eggila kenami sa langun datù tegeAmoliya eg-ugpà diyà sa getan-getan.”

<sup>7</sup>Huenan di, mig-angay Hosuwa i owoy sa langun sundalu di lapeg sa medoo nelayam eggila kedu diyà sa menuwa Gilgal anì tabangan da sa medoo tegeGibayon. <sup>8</sup>Mig-ikagi Datù Nemula i diyà si Hosuwa, guwaen di, “Yoko egkelimedangan na diyà kenagda, enù ka ipelugpì ku doo kagda diyà keniyu. Apiya sebaen, endà duen sa mekeatu diyà keniyu.” <sup>9</sup>Na, nekeelut sigep sa keipanaw da i Hosuwa owoy sa medoo sundalu di kedu diyà Gilgal. Huenan di, nepetow sa medoo sundalu nekeulingut diyà sa menuwa Gibayon danà sa kinetebow da i Hosuwa. <sup>10</sup>Ini sa binaelan i Datù Nemula, linimedang di sa medoo tegeAmoliya egoh da mighaa sa medoo sundalu tegeIslaél. Huenan di, medoo sa tegeAmoliya inimatayan sa medoo tegeIslaél diyà sa menuwa Gibayon, owoy linohot da ma eg-imatayan sa medoo duma tegeAmoliya migpelaguy eglungel diyà Bét-holon taman nekeuma da diyà sa menuwa Asikah owoy menuwa Makidah. <sup>11</sup>Ligò sa medoo tegeAmoliya egpelaguy eglohoten sa medoo tegeIslaél, egkenabù diyà kenagda sa dakel bunga't udan danà i Datù Nemula. Huenan di, medoo temù sa nematay. Uman pa kedoo sa nematay danà da nesugat sa dakel bunga't udan diyà sa kedoo nematay danà sa kinemkem sa tegeIslaél.

<sup>12</sup>Na, egoh iya wé agdaw egoh i Datù Nemula migpetaban si Hosuwa owoy sa medoo tegeIslaél diyà sa medoo tegeAmoliya, mig-ikagi Hosuwa i diyà si Datù Nemula diyà sa taengan sa medoo tegeIslaél. Guwaen di, “Agdaw, ugpà ka diyà sa belungan langit diyà sa selatal menuwa Gibayon. Owoy bulan, ugpà ka ma diyà sa selatal sa lepak Ayalon.” <sup>13</sup>Hê, tuu doo, mig-ugpà sa agdaw owoy mig-ugpà ma sa bulan taman sa egoh da migtaban diyà sa medoo kuntelà da. Na, nekesulat ma ini i nebaelan diyà sa igsulat i Hasal. Tuu doo, mig-ugpà sa agdaw diyà sa selatal belungan langit, owoy endà migsalep di. Huenan di, lagà duwa agdaw sa lugay iya wé segeagdaw. <sup>14</sup>Edung egoh anay taman ini egoh di, endà dé duen sa

agdaw hauwen ta éhê iya wé agdaw, egoh i Datù Nemula migpangunut diyà sa igsugù sa etaw, enù ka tigtu pinetaban i Datù Nemula sa medoo tegeIslaél.

<sup>15</sup>Agulé miglikù Hosuwa i owoy sa langun sundalu di diyà sa kenà da mig-esud diyà Gilgal.

### Ini Sa Sabuhanan Kagi I Hosuwa

**23** <sup>1</sup>Na, egoh di nelugaylugay dé sa egoh i Datù Nemula migpetepel sa medoo tegeIslaél sa tanà Kanan, endà dé nebogo da danà sa medoo kuntelà da eg-ugpà medapag diyà kenagda. Egoh iya, temù dé lukes Hosuwa i. <sup>2</sup>Huenan di, sinetipon di sa langun etaw tegeIslaél épê egkegaga, sa medoo ulu-ulu da owoy sa medoo kaunutan da owoy sa medoo uwis da owoy sa medoo datù da ma. Agulé mig-ikagi diyà kenagda, guwaen di, “Lukes a dé temù. <sup>3</sup>Hinaa yu dé sa langun binaelan i Datù Nemula sa egpigtuuwen ta diyà sa medoo balangan etaw mig-ugpà dahini egoh anay anì meheniyu dé siini tanà. Tinabangan i Datù Nemula kiyu sa egoh yu miggila, huenan di migtaban yu. <sup>4</sup>Ubus dé sinebaedbaed ku sa langun tanà edung diyà sa lawa't Holdan denu tebowon agdaw taman sa Dagat Méditeliya denu eledan agdaw anì dumuen sa uwang tanà sa uman segeumpung tugod i Islaél. Igbegay ku diyà keniyu sa tanà sa langun balangan etaw tinabanan ta dé owoy sa tanà siedò medoo balangan etaw eg-ugpà pelawà dahini sa endà pa tinabanan ta duu. <sup>5</sup>Migpasad Datù Nemula i diyà kenita pepelaguyen di sa medoo kuntelà yu kedu diyà keniyu owoy hemagawan di ma kagda ligò yu egseilud-ilud egtepel sa tanà da anì mekuwa yu sa tanà da. Na, petuuwen i Datù Nemula sa egpigtuuwen ta doo iya wé igpasad di. <sup>6</sup>Huenan di, tulik yu anì tigtu pangunutan yu sa langun uledin igsulat i Mosis egoh anay. Yoko egsekè ya diyà sa uledin egpangunutan yu. <sup>7</sup>Amuk hediya sa egbaelan yu, endà meseamut yu sa medoo balangan etaw nesamà eg-ugpà diyà sa tanà Kanan. Yoko egsimbà ya diyà sa egpenemulawen da, owoy yoko ma egpengibet duu sa ngadan da amuk peelesen yu sa igpasad yu. Yoko egpenemula duu sa medoo egpenemulawen da owoy yoko ma egligkued da diyà sa taengan da. <sup>8</sup>Dodoo tigtu yu polo unut diyà si Datù Nemula lagà mendaa sa egbaelan yu taman ini egoh di. <sup>9</sup>Taa yu. Egoh yu migseilud-ilud, hinemagawan i Datù Nemula doo sa medoo balangan etaw mebagel owoy épê dakel egkegaga ma. Endà duen etaw mekeatu diyà keniyu. <sup>10</sup>Apiya segeetaw daa diyà keniyu, tabanan di doo sa sengibu geetaw kuntelà di, enù ka iya sa gumila kenagda si Datù Nemula sa egpigtuuwen ta, beken kiyu, lagà mendaa sa igpasad di diyà kenita. <sup>11</sup>Huenan di, tuliki yu sa pedu yu anì ipusung yu Datù Nemula i sa egpigtuuwen ta. <sup>12</sup>Enù ka amuk iniyugan yu kagdi i owoy amuk meseamut yu sa medoo balangan etaw eg-ugpà pelawà diyà sa tanà owoy

amuk pesawaen yu ma sa anak yu diyà kenagda, <sup>13</sup>metiigan yu doo endà dé umuman Datù Nemula i humemaga siini medoo balangan etaw amuk sumeilud-ilud yu tumepel sa tanà da. Dodoo medaetan yu polo danà da enù ka lagà da katal ataw ka kaseb, owoy mesakitan yu ma danà da enù ka lagà tinapes da sa iyug yu ataw ka lagà binigsuk da dugi sa mata yu. Meumanan siini medoo medaet mebaelan yu taman sa egoh di endà dé dumuen sa etaw mesamà diyà keniyu umugpà diyà siini mepion tanà igbegay i Datù Nemula diyà keniyu.”

<sup>14</sup>Guwaen ma i Hosuwa, “Na, buyu dé meuma sa egoh ku mematay. Dodoo kiyu, netiigan yu doo diyà sa pedu yu pinetuu i Datù Nemula sa langun mepion igpasad di diyà keniyu egoh anay owoy nesakem yu dé sa langun igpasad di ibegay di diyà keniyu. Endà duen sa igpasad di endà egpetuuwen di duu. <sup>15</sup>Dodoo taa yu. Pinetuu i Datù Nemula sa langun mepion igpasad di diyà keniyu, hediya ma ipetuu di ma sa langun kepigtamay igpasad di diyà keniyu taman sa egoh yu megelà diyà siini mepion tanà igbegay di diyà keniyu. <sup>16</sup>Amuk endà pangunutan yu duu sa langun uledin igsugù i Datù Nemula diyà keniyu, owoy amuk sumimbà yu polo diyà sa medoo liyu egpenemulawen danà yu egpenemula kenagda, pigtamayan i Datù Nemula doo kiyu danà sa kebulit di. Amuk hediya, endà melugay di melengon yu mekesugsug diyà siini mepion tanà igbegay di diyà keniyu.”